



Broj/ Број : 02/2-50-1-13-6-33/07

Sarajevo/ Сарајево : 22.10.2007. godine

ZAPISNIK

6. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine, održane 17.09.2007. godine

Šestu sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH sazvala je predsjedavajuća Komisije, Alma Čolo.

Sjednici Komisije za vanjsku i trgovinsku politiku, carine, saobraćaj i komunikacije Doma naroda, u svojstvu članova Komisije, prisustvovali su: Alma Čolo, Dušanka Majkić, Slobodan Šaraba, Adem Ibrahimpašić, Branko Zrno, te Aida Kreho – stručni saradnik pri Komisiji za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine.

Odsustvo je opravdao Rudo Vidović.

U svojstvu predlagача, sjednici su prisustvovali: Nataša Šakota – asistent pri Programu jačanja zakonodavne vlasti OSCE-a, Amela Kreho – viši ekonomski savjetnik i zamjenik šefa ekonomskog odjela u Uredu visokog predstavnika, Ismet Šečić – stručni saradnik, Željko Knežević i Kojo Koprivica – pomoćnici ministra u Ministarstvu komunikacija i transporta BiH, Miroljub Krunić – pomoćnik ministra u Ministarstvu finansija i trezora BiH, Lejla Solunović i Dragan Vukadin – stručni saradnici u Ministarstvu sigurnosti BiH, Zoran Perković – pomoćnik ministra u Ministarstvu vanjskih poslova BiH, Biljna Čamur i Miodrag Pandurević – pomoćnici ministra u Ministarstvu civilnih poslova BiH, Sabrija Šerifović – pomoćnik ministra u Ministarstvu vanjske trgovine i ekonomskih odnosa BiH, te Lidija Vignjević – direktorica Instituta za intelektualno vlasništvo BiH.

Sjednica Komisije za vanjsku i trgovinsku politiku, carine, saobraćaj i komunikacije Doma naroda BiH započela je u 10 sati.

Nakon što je konstatovala da postoji kvorum, predsjedavajuća Komisije, Alma Čolo, predložila je sljedeći

DNEVNI RED

1. Usvajanje Zapisnika 5. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH;

2. Prijedlog zakona o zaštiti planova rasporeda integriranih kola (prvo čitanje);
3. Prijedlog zakona o elektronskom pravnom i poslovnom prometu (prvo čitanje);
4. Prijedlog zakona o izmjeni Zakona o konkurenciji (drugo čitanje);
5. Davanje saglasnosti za ratifikaciju Sporazuma o izmjeni i pristupanju Centralnoevropskom sporazumu o slobodnoj trgovini (CEFTA 2006. godina);
6. Davanje saglasnosti za ratifikaciju Sporazuma između Bosne i Hercegovine i Republike Litvanije o unapređenju i zaštiti investicija;
7. Davanje saglasnosti za ratifikaciju Kreditnog sporazuma između Bosne i Hercegovine i Fonda za međunarodni razvoj OPEC-a – Projekat unapređenja ruralnog preduzenništva;
8. Davanje saglasnosti za ratifikaciju Ugovora o finansiranju između Bosne i Hercegovine i Evropske investicione banke – Projekat sanacije puteva u Federaciji BiH;
9. Davanje saglasnosti za ratifikaciju Sporazuma između Bosne i Hercegovine i Kraljevine Norveške o finansiranju projekata u korist pravosuđa i/ili sudova i tužilaštava u Bosni i Hercegovini;
10. Davanje saglasnosti za ratifikaciju Sporazuma o finansiranju – Dodatno finansiranje za Projekat razvoja zajednica - između Bosne i Hercegovine i Međunarodne asocijacije za razvoj;
11. Davanje saglasnosti za ratifikaciju Sporazuma o saradnji između Vijeća ministara BiH i Države Kuvajt u oblasti kulture, informisanja, nauke i obrazovanja;
12. Davanje saglasnosti za ratifikaciju Ugovora između Bosne i Hercegovine i Republike Hrvatske o dvojnem državljanstvu;
13. Davanje saglasnosti za ratifikaciju Okvirnog sporazuma između Vijeća ministara BiH i Vlade Republike Turske o saradnji na polju vojne obuke, tehnike i nauke;
14. Davanje saglasnosti za ratifikaciju Sporazuma između Bosne i Hercegovine i Švicarske Konfederacije o policijskoj saradnji u borbi protiv kriminala;
15. Davanje saglasnosti za ratifikaciju Sporazuma o zračnom saobraćaju između Bosne i Hercegovine i Islamske Republike Pakistan;
16. Razmatranje Izvještaja Zajedničke komisije za evropske integracije sa 9. interparlamentarnog sastanka sa Delegacijom Evropskog parlamenta za odnose sa zemljama Jugoistočne Evrope, održanog u Briselu, 28.06.2007. godine;
17. Razmatranje Izvještaja stalne delegacije PS BiH pri Parlamentarnoj skupštini NATO-a sa Proljetnog zasjedanja Parlamentarne skupštine NATO-a, održanog u Madeiri, Portugal, od 25. – 28.05.2007. godine;
18. Razmatranje Izvještaja Stalne delegacije PS BiH pri Parlamentarnoj skupštini NATO-a sa Rose Roth seminaru u organizaciji Parlamentarne skupštine NATO-a, održanog u Dubrovniku, od 24. – 26.06.2007. godine;
19. Razmatranje izvještaja i informacija sa održanih sastanaka i seminara Zajedničke komisije za odbranu i sigurnost PS BiH;
20. Razmatranje Izvještaja stalne delegacije PS BiH pri Parlamentarnoj skupštini OSCE-a sa 16. godišnjeg zasjedanja Parlamentarne skupštine OSCE-a, održanog u Kijevu, od 04. – 09.07.2007;
21. Tekuća pitanja

Dnevni red je jednoglasno usvojen.

Ad.1. Usvajanje Zapisnika 5. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH;

Zapisnik 5. sjednice Komisije za vanjsku i trgovinsku politiku, carine, saobraćaj i komunikacije Doma naroda PSBiH jednoglasno je usvojen.

Ad.2. Prijedlog zakona o zaštiti planova rasporeda integriranih kola (prvo čitanje)

Osnovne napomene o Prijedlogu zakona o zaštiti planova rasporeda integriranih kola dala je Lidija Vignjević, direktorica Instituta za intelektualno vlasništvo BiH. Ustavni osnov za donošenje Zakona o zaštiti planova rasporeda integriranih kola dat je u članu 3. stav 1. Ustava BiH, gdje se isključivo navodi da je topografija integriranih kola, kao jedno od prava intelektualnog vlasništva, samo jedan od segmenata vanjskotrgovinske politike BiH. Kao osnovne razloge za donošenje Zakona, gđa. Vignjević navela je ispunjenje obaveza za pristupanje Bosne i Hercegovine Svjetskoj trgovinskoj organizaciji, ispunjenje obaveza iz dokumenta „Evropsko partnerstvo sa BiH“, te ispunjenje obaveza predviđenih članom 73. Sporazuma o stabilizaciji i pridruživanju. Samim Prijedlogom zakona o zaštiti planova rasporeda integriranih kola uređuju se uslovi i pravo na zaštitu topografija poluvodičkih proizvoda, postupak, registracija i objava registrovane topografije, sadržaj registra, plaćanje takse i troškova postupka, učinci zaštite i ograničenja, iscrpljenje prava, njihovo trajanje, prestanak i promet, te građanskopravna zaštita.

Imajuću u vidu da je Prijedlog zakona o zaštiti planova rasporeda integriranih kola, zakon od iznimne važnosti za Bosnu i Hercegovinu, članovi Komisije jednoglasno su podržali principe predloženog zakona, te odlučili predložiti Domu naroda njegovo usvajanje u prvom čitanju.

Ad.3. Prijedlog zakona o elektronskom pravnom i poslovnom prometu (prvo čitanje)

Ispred nadležnog ministarstva, Ministarstva komunikacija i transporta BiH, uvodne napomene o Prijedlogu zakona dao je Željko Knežević.

Ovim zakonom uređuje se pravni okvir za određene aspekte elektronskog pravnog i poslovnog prometa, koji obuhvata poduzimanje i pružanje usluga informacionog društva, obaveze davaoca usluga u vezi informisanja, zaključivanje ugovora i odgovornost davaoca usluga. Također, istakao je da je osnovni razlog donošenja Zakona, stvaranje uslova za razvoj e-commerca, što utiče na ekonomski razvoj, konkurentnost privrednih subjekata, te otvaranje novih radnih mjesta.

Direkcija za evropske integracije dostavila je i svoje mišljenje o Prijedlogu zakona, u kojem se navodi da BiH, regulisanjem ove oblasti, ispunjava ciljeve Strategije integrisanja u Evropsku uniju, te obaveze naznačene u Akcionom planu Srednjoročne razvojne strategije BiH 2004. – 2007. godina. Također se navodi da, iako je Prijedlog zakona djelomično usklađen sa odredbama *acquis-a*, on uspješno definiše pravni okvir koji će obezbijediti pravnu sigurnost elektronskog pravnog i poslovnog prometa.

Druga zamjenica predsjedavajuće, Dušanka Majkić izrazila je nezadovoljstvo zbog neozbiljnog odnosa kreatora prijedloga zakona, koji se ogleda u veoma čestom dostavljanu ispravki na tekst prijedloga zakona, što se desilo i u ovom slučaju. Naime, predlagač je 13.07.2007. godine poslao tekst Prijedloga zakona u parlamentarnu proceduru, da bi već 04.09.2007. poslao ispravke. Gđa. Majkić zamolila je predlagače da se obrati malo veća pažnja kako se greške ne bi ponavljale ubuduće.

Članovi Komisije jednoglasno su podržali principe predloženog zakona, te odlučili predložiti Domu naroda njegovo usvajanje u prvom čitanju.

Ad.4. Prijedlog zakona o izmjeni Zakona o konkurenciji (drugo čitanje)

Prijedlog zakona o konkurenciji razmatrao se u skladu sa članom 104. Poslovnika Doma naroda. Predsjedavajuća Komisije naglasila je da amandmana na predloženi tekst zakona nije bilo.

Članovi Komisije jednoglasno su prihvatili tekst Prijedloga zakona o izmjeni zakona o konkurenciji, te odlučili predložiti Domu njegovo usvajanje.

Ad.5. Davanje saglasnosti za ratifikaciju Sporazuma o izmjeni i pristupanju Centralnoevropskom sporazumu o slobodnoj trgovini (CEFTA 2006. godina)

Osnovne informacije o Sporazumu, članovima Komisije, iznio je Sabrija Šerifović iz Ministarstva vanjske trgovine i ekonomskih odnosa BiH. CEFTA Sporazum postoji od 1994. godine, a njegov osnovni, globalni cilj, jeste priprema zemlje za pristupanje Evropskoj uniji, što potvrđuje i činjenica da su sve zemlje, koje su dosada ratifikovale Sporazum, članice ili kandidati za stupanje u članstvo EU. Brojne su prednosti članstva u CEFTA-i. Naime, postiže se potpuna sloboda trgovine robama i uslugama, poboljšavaju se uslovi za investiranje u zemlju, štiti se intelektualno vlasništvo, te se postiže dijagonalna kumulacija porijekla robe.

Uslijedila je rasprava u kojoj su učestvovali svi članovi Komisije. Dušanka Majkić istakla je kako je Sporazum CEFTA veoma važna tema, o kojoj se u javnosti u posljednje vrijeme mnogo diskutuje. Njen stav je da Sporazum CEFTA sa sobom nosi i prednosti i mane, ali da su prednosti koje se ogledaju u otvaranju radnih mjesta, većem investiranju u zemlju, stvaranju bescarinske zone i liberalizaciji tržišta sa više od 50 miliona ljudi, svakako značajnije.

U diskusiji je učestvovao i Adem Ibrahimpašić, koji je, također govorio u korist CEFTA Sporazuma. Istaknuo je da je najveća prednost otvaranje tržišta, te slobodna trgovina sa zemljama regiona. Slobodan Šaraba se složio sa svim dotada rečenim, ali je, u cilju zaštite domaće proizvodnje, predložio i usvajanje Zaključka, koji glasi: „Obavezuje se Vijeće ministara da u saradnji sa entitetskim vladama utvrdi Program mjera za zaštitu domaće proizvodnje, te o učinjenom obavijesti Komisiju za vanjsku i trgovinsku politiku, carine, saobraćaj i komunikacije Doma naroda, u roku od 60 dana“.

Predsjedavajuća Komisije zamolila je g. Šarabu da istovjetan Zaključak predloži na sjednici Doma naroda, imajući u vidu odredbu Poslovnika da uslovljavanje davanja saglasnosti za ratifikaciju teksta međunarodnih sporazuma i ugovora nije moguće, s čim se g. Šaraba složio.

Članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma o izmjeni i pristupanju Centralnoevropskom sporazumu o slobodnoj trgovini (CEFTA 2006. godina).

Ad.6. Davanje saglasnosti za ratifikaciju Sporazuma između Bosne i Hercegovine i Republike Litvanije o unapređenju i zaštiti investicija

Ad.7. Davanje saglasnosti za ratifikaciju Kreditnog sporazuma između Bosne i Hercegovine i Fonda za međunarodni razvoj OPEC-a – Projekat unapređenja ruralnog preduzeništva

Ad.8. Davanje saglasnosti za ratifikaciju Ugovora o finansiranju između Bosne i Hercegovine i Evropske investicione banke – Projekat sanacije puteva u Federaciji BiH

Ad.9. Davanje saglasnosti za ratifikaciju Sporazuma između Bosne i Hercegovine i Kraljevine Norveške o finansiranju projekata u korist pravosuđa i/ili sudova i tužilaštava u Bosni i Hercegovini

Ad.10. Davanje saglasnosti za ratifikaciju Sporazuma o finansiranju – Dodatno finansiranje za Projekat razvoja zajednica - između Bosne i Hercegovine i Međunarodne asocijacije za razvoj

O Sporazumima i Ugovorima, uvodne napomene dao je Miroljub Krnić iz Ministarstva vanjske trgovine i ekonomskih odnosa BiH. Sporazum o unapređenju i zaštiti investicija je tipski sporazum, kakvih je Bosna i Hercegovina zaključila sa oko dvadeset drugih zemalja svijeta. Njime

se osigurava jednak i pravičan tretman investicijama izvršenim od strane investitora, te njihova zaštita i sigurnost.

Kreditnim sporazumom, zaključenim sa Fondom za međunarodni razvoj OPEC-a, Bosni i Hercegovini se odobrava kredit u iznosu od 5.950.000 US dolara, sa kamatom od 3.25%. Kredit će služiti za osiguravanje spovođenja projekta ruralnog preduzetništva.

Ugovorom o finansiranju, zaključenim između Bosne i Hercegovine i Evropske investicione banke, zajmoprimcu se obezbjeđuju sredstva u iznosu od 50.000.000. eura. Kamata može biti fiksna ili varijabilna, a to isključivo ovisi od toga koju će varijantu izabrati dužnik.

Sporazumom između Bosne i Hercegovine i Kraljevine Norveške se Visokom sudskom i tužilačkom vijeću BiH omogućava finansijska pomoć u iznosu od 580.000. eura. Pomoć se sastoji iz doprinosa za finansiranje projekta renoviranja zgrade za smještaj Okružnog suda Istočno Sarajevo, doprinosa za finansiranje projekta obnove dijelova zgrade u kojoj su smješteni Kantonalni sud u Sarajevu i Općinski sud u Sarajevu, te ostalih doprinosa za potrebe finansiranja projekata u korist pravosuđa i/ili sudova i tužilaštava u BiH.

Sporazum o finansiranju između Bosne i Hercegovine i Međunarodne asocijacije za razvoj zaključen je s ciljem unapređenja osnovnih službi i objekata za zajednice sa niskim dohotkom i siromašne zajednice u opštinama koje nemaju dovoljno usluga, upravljanja i kapaciteta u lokalnim vladama, te za obezbjeđivanje službi i pružanje usluga siromašnim zajednicama kroz partnerstvo sa zajednicama, i iznosi 3.400.000. eura.

Članovi Komisije jednoglasno su donijeli odluku o davanju saglasnosti za ratifikaciju Sporazuma između Bosne i Hercegovine i Republike Litvanije o unapređenju i zaštiti investicija; Kreditnog sporazuma između Bosne i Hercegovine i Fonda za međunarodni razvoj OPEC-a – Projekat unapređenja ruralnog preduzetništva; Ugovora o finansiranju između Bosne i Hercegovine i Evropske investicione banke – Projekat sanacije puteva u Federaciji BiH; Sporazuma između Bosne i Hercegovine i Kraljevine Norveške o finansiranju projekata u korist pravosuđa i/ili sudova i tužilaštava u Bosni i Hercegovini; Sporazuma o finansiranju – Dodatno finansiranje za Projekat razvoja zajednica - između Bosne i Hercegovine i Međunarodne asocijacije za razvoj.

Ad.11. Davanje saglasnosti za ratifikaciju Sporazuma o saradnji između Vijeća ministara BiH i Države Kuvajt u oblasti kulture, informisanja, nauke i obrazovanja

Ad.12. Davanje saglasnosti za ratifikaciju Ugovora između Bosne i Hercegovine i Republike Hrvatske o dvojnog državljanstvu

Biljna Čamur i Miodrag Pandurević su ispred nadležnog ministarstva, Ministarstva civilnih poslova BiH, dali uvodne napomene za navedene tačke.

Sporazum sa Državom Kuvajt zaključen je u želji da se ojačaju prijateljski odnosi između naroda, te u namjeri da se međusobna saradnja u oblasti kulture, nauke i obrazovanja unaprijedi. Propagira se i razmjena informacija koje se odnose na organizaciju sajмова, festivala, sastanaka, muzičkih i pozorišnih predstava i slično.

Što se tiče Ugovora o dvojnog državljanstvu sa Republikom Hrvatskom, ugovorne strane saglasne su da državljani Bosne i Hercegovine, kao i Republike Hrvatske, mogu sticati državljanstvo druge ugovorne strane, na način utvrđen propisima ugovornih strana. Dvojni državljani uživati će jednaka prava kao i svaki drugi državljanin ugovornih strana, uz obavezu služenja vojnog roka u zemlji u kojoj imaju prebivalište, aktivno i pasivno biračko pravo, te uživaju diplomatsku i konzularnu zaštitu ugovorne strane čiju zaštitu zatraže.

Članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma o saradnji između Vijeća ministara BiH i Države Kuvajt u oblasti kulture, informisanja, nauke i obrazovanja, te Ugovora između Bosne i Hercegovine i Republike Hrvatske o dvojnog državljanstvu.

Ad.13. Davanje saglasnosti za ratifikaciju Okvirnog sporazuma između Vijeća ministara BiH i Vlade Republike Turske o saradnji na polju vojne obuke, tehnike i nauke

Uvodne napomene o Sporazumu dao je Zoran Perković, iz Ministarstva vanjskih poslova BiH. Svrha Sporazuma je da položi temelje za odnose koji treba da se uspostave u područjima vojne obuke, tehnologije i nauke, te da odredi osnove saradnje između ugovornih strana. Sporazum se odnosi i na razmjenu osoblja, materijala, opreme, informacija i iskustava u područjima vojne obuke i obrazovanja, vojno-obavještajnog rada, vojne medicine, kartografije, vojne historije, komunikacija, te tehnološko-naučnih inovacija i informatičkih sistema.

Članovi Komisije jednoglasno su prihvatili Okvirni sporazum, te odlučili predložiti Domu naroda davanje saglasnosti za ratifikaciju.

Ad.14. Davanje saglasnosti za ratifikaciju Sporazuma između Bosne i Hercegovine i Švicarske Konfederacije o policijskoj saradnji u borbi protiv kriminala

O Sporazumu je govorila Lejla solunović iz Ministarstva sigurnosti BiH. Sporazum je zaključen u nadi jačanja bilateralne policijske saradnje između ugovornih strana u sprečavanju, otkrivanju i istraživanju kriminala i to putem razmjene strateških i operativnih informacija, te redovnih kontakata između nadležnih organa na svim nivoima.

Članovi Komisije odlučili su predložiti Domu naroda davanje saglasnosti za ratifikaciju Sporazuma između Bosne i Hercegovine i Švicarske Konfederacije o policijskoj saradnji u borbi protiv kriminala.

Ad.15. Davanje saglasnosti za ratifikaciju Sporazuma o zračnom saobraćaju između Bosne i Hercegovine i Islamske Republike Pakistan

Predstavnik Ministarstva transporta i komunikacija, Ismet Šečić, istaknuto je da se radi o tipskom Sporazumu, zaključenom u želji da se promoviše međunarodni sistem zrakoplovstva, zasnovan na konkurenciji između prevoznika, u želji osiguravanja najvišeg nivoa sigurnosti u međunarodnom zračnom saobraćaju, te u želji da se ohrabre pojedinačni zrakoplovni prevoznici za razvijanje i implementaciju novih i konkurentnih cijena.

Članovi Komisije odlučili su predložiti Domu naroda davanje saglasnosti za ratifikaciju Sporazuma o zračnom saobraćaju između Bosne i Hercegovine i Islamske Republike Pakistan.

Ad.16. Razmatranje Izvještaja Zajedničke komisije za evropske integracije sa 9. interparlamentarnog sastanka sa Delegacijom Evropskog parlamenta za odnose sa zemljama Jugoistočne Evrope, održanog u Briselu, 28.06.2007. godine;

Ad.17. Razmatranje Izvještaja stalne delegacije PS BiH pri Parlamentarnoj skupštini NATO-a sa Proljetnog zasjedanja Parlamentarne skupštine NATO-a, održanog u Madeiri, Portugal, od 25. – 28.05.2007. godine;

Ad.18. Razmatranje Izvještaja Stalne delegacije PS BiH pri Parlamentarnoj skupštini NATO-a sa Rose Roth seminara u organizaciji Parlamentarne skupštine NATO-a, održanog u Dubrovniku, od 24. – 26.06.2007. godine;

Ad.19. Razmatranje izvještaja i informacija sa održanih sastanaka i seminara Zajedničke komisije za odbranu i sigurnost PS BiH;

Ad.20. Razmatranje Izvještaja stalne delagacije PS BIH pri Parlamentarnoj skupštini OSCE-a sa 16. godišnjeg zasjedanja Parlamentarne skupštine OSCE-a, održanog u Kijevu, od 04. – 09.07.2007;

Članovi Komisije primili su k znanju razmatrane izvještaje sa održanih sastanaka.

Ad.21. Tekuća pitanja

Rasprava nije vođena.

Sjednica Komisije završena je u 12:30 sati.

Stručni saradnik pri Komisiji
za vanjsku i trgovinsku politiku,
carine, saobraćaj i komunikacije

Aida Kreho

Predsjedavajuća Komisije
za vanjsku i trgovinsku politiku,
carine, saobraćaj i komunikacije

Alma Čolo